



16. december 2025

Inatsisartut suleriaasianni § 37 imm. 1 naapertorlugu Naalakkersuisunut apeqquteqaatit imaattut matumuuna saqqummiuppakka.

Naalakkersuisunut apeqqutit:

1. Nanortalimmi umiarsualiveqarnikkut annertusaanissat eqqarsaatigalugit Naalakkersuisut pilersaaruteqarpat?
 - a) Nanortalip eqqaani aatsitassarsiorfinnik ineriartortoqalersinnaanera eqqarsaatigulu Nanortalimmi umiarsualiveqarnikkut inerisaanissaq Naalakkersuisut pissusissamisoortutut isumaqarfigaat?
2. Nanortalimmi suluusalinnut mittarfimmik pilersitsisoqarsinnaaneranik pilersaarummik imaluunniit paasissutissanik Naalakkersuisut pigisaqarpat?
 - a) Nanortalip eqqaani aatsitassarsiorfinnik ineriartortoqalersinnaanera eqqarsaatigalugu Nanortalimmi suluusalinnut mittarfeqarnikkut inerisaanissaq Naalakkersuisut pissusissamisoortutut isumaqarfigaat?
3. Aatsitassalerinermik ilinniarfimmik imaluunniit immikkoortortaqaarfimmik Nanortalimmi pilersitsinissaq Naalakkersuisut qanoq isumaqarfigaat?

(Inatsisartunut ilaasortaq Anders Olsen, Siumut)

Tunngavilersuut:

Sapaatip akunnera kingulleq Naalakkersuisut nalunaarutigaa Nanortalip eqqaani Amitsumi aatsitassarsiorluni piiaanissamik akuersissummik tunisisoqartoq. Akuersissut ukiunut 30-nut grafit-inut piiaanissamut tunniunneqarluni.

Tamanna Nanortalimmiunut eqqaamiuinullu assut tusarluarnarpoq, tassami nunatta kujaterpiaani inuussutissarsiutitigut ineriartortitsinissaq annertuumik ukiorpassuanngortuni amigaataasoq kiisami ilorraap tungaanut saatinneqartussanngornera periarfissarissaalissammat.

Nanortalip eqqannguani aatsitassarsiorfiit marluk ingerlanneqalertussaapput, taamaammat Nanortalimmi assigiinngitsutigut ineriartortitsinissat avaqqunneqarsinnaanngillat. Ilaatigut umiarsualiveqarnikkut massakkumiit annertunerujussuarmik atorfissaqartitsinerulertoqartussaavoq aammalu tikikkuminassuseq eqqarsaatigalugu suluusalinnut mittarfik pilersinneqartariaqartoq isumaqarlunga.

Aatsitassarsiorfiit marluk Nanortalip eqqannguani ingerlanneqalertussat eqqarsaatigalugit tulluartsuorivarattaq Aatsitassanut ilinniarfimmik imaluunniit immikkoortortamik Nanortalimmi



pilersitsinissaq, Nanortalimmimi inuussutissarsiutinut ilinniarfimmik maannamut soqanngilaq, taamaammallu illoqarfiit allat assigalugit ilinniarfeqalersinnaaneq tassuunakkut aamma matussuserneqakutsoorsinnaalluni.

Apeqqutigineqartut ullut suliffiusut qulit iluanni akeqquneqarput.